



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԸ

ԱՐԴՅՈՒՆԱԲԵՐԱԿԱՆ ՔԱՂԱՔԱԿԱՆՈՒԹՅԱՆ ՄԱՍԻՆ

Ընդունվել է 19.11.2014

- [Գլուխ 1. Ընդհանուր դրույթներ](#)
- [Գլուխ 2. Արդյունաբերության զարգացման պետական եւ տարածքային ծրագրերը](#)
- [Գլուխ 3. Արդյունաբերական քաղաքականության օբյեկտների պետական աջակցությունը](#)
- [Գլուխ 4. Եզրափակիչ դրույթ](#)

ԳԼՈՒԽ 1

ԸՆԴՀԱՆՈՒՐ ԴՐՈՒՅԹՆԵՐ

Հոդված 1. Օրենքի կարգավորման առարկան

1. Սույն օրենքը կարգավորում է արդյունաբերական քաղաքականության մշակման, իրականացման, արդյունաբերական գոտիների գործունեության կազմակերպման ընթացքում իրավաբանական անձանց, անհատ ձեռնարկատերերի, պետական կառավարման մարմինների միջեւ ծագող իրավահարաբերությունները, արդյունաբերության զարգացման պետական եւ տարածքային ծրագրերի մշակման եւ իրականացման հարաբերությունները:

Հոդված 2. Արդյունաբերական քաղաքականության մասին օրենսդրությունը

1. Արդյունաբերական քաղաքականության մասին Հայաստանի Հանրապետության օրենսդրությունը բաղկացած է սույն օրենքից, Հայաստանի Հանրապետության քաղաքացիական օրենսգրքից, մաքսային եւ հարկային հարաբերությունները կարգավորող օրենքներից եւ այլ իրավական ակտերից:

2. Եթե Հայաստանի Հանրապետության միջազգային պայմանագրերով սահմանված են այլ նորմեր, քան նախատեսված են սույն օրենքով, ապա գործում են միջազգային պայմանագրերի նորմերը:

Հոդված 3. Օրենքում օգտագործվող հիմնական հասկացությունները

1. Սույն օրենքում օգտագործվում են հետևյալ հիմնական հասկացությունները.

1) **արդյունաբերական քաղաքականություն (այսուհետ՝ ԱՔ)**՝ միջոցառումների համակարգ, որն ուղղված է արդյունաբերության ոլորտում առաջադիմական փոփոխությունների իրականացմանը՝ պետական գերակայություններին համապատասխան, երկրի արտադրական ներուժի արդյունավետ օգտագործմանն ու զարգացմանը.

2) **արդյունաբերական քաղաքականության օբյեկտներ**՝ արդյունաբերական արտադրանք թողարկող իրավաբանական անձինք եւ անհատ ձեռնարկատերեր.

3) **արդյունաբերական գոտի**՝ առանձնացված տարածք, որը համապատասխանում է սույն օրենքով սահմանված պահանջներին, եւ որտեղ իրականացվում է բացառապես արդյունաբերական գործունեություն: Արդյունաբերական գոտին կարող է ունենալ ազատ տնտեսական գոտու կարգավիճակ, որտեղ իրականացվում է բացառապես արդյունաբերական գործունեություն, եւ որտեղ ձեռնարկատիրական գործունեությունն իրականացվում է «Ազատ տնտեսական գոտիների մասին» Հայաստանի Հանրապետության օրենքով սահմանված առանձնահատկություններին համապատասխան.

4) **արդյունաբերական գոտու կազմակերպիչ (այսուհետ՝ կազմակերպիչ)**՝ բացառապես արդյունաբերական գոտու կազմակերպման նպատակով հիմնադրի կողմից ստեղծված (հիմնադրված) կամ ընտրված իրավաբանական անձ,

որն ապահովում է արդյունաբերական գոտում գործունեություն իրականացնելու համար անհրաժեշտ ենթակառուցվածքների ստեղծումը եւ ծառայությունների մատուցումը.

5) **արդյունաբերական գոտու շահագործող (այսուհետ՝ շահագործող)**՝ սույն օրենքին համապատասխան՝ բացառապես արդյունաբերական գոտում, բացառապես արտադրական գործունեություն իրականացնող՝ Հայաստանի Հանրապետությունում գրանցված իրավաբանական անձ, անհատ ձեռնարկատեր կամ մասնաճյուղ, ինչպես նաեւ օտարերկրյա կազմակերպության ներկայացուցչություն, որն ունի տվյալ գոտու կազմակերպչի հետ կնքված համապատասխան պայմանագիր.

6) **լիազոր մարմին**՝ արդյունաբերական գոտիների պետական քաղաքականության բնագավառում Հայաստանի Հանրապետության կառավարության լիազորած պետական կառավարման մարմին:

Հոդված 4. Արդյունաբերական քաղաքականության իրականացման պետական կարգավորումը

1. Հայաստանի Հանրապետության կառավարությունն իրականացնում է սույն օրենքով եւ այլ իրավական ակտերով սահմանված կարգով արդյունաբերական քաղաքականության մշակումը եւ իրականացումը հետեւյալ հիմնական ուղղություններով.

1) ներդրումային եւ գործարար միջավայրի բարելավում, ներառյալ՝ փոքր եւ միջին արդյունաբերական ձեռնարկությունների գործունեության խրախուսում եւ աջակցություն.

2) հարկային վարչարարության իրականացման ընթացակարգերի կրճատում.

3) արտահանման եւ ներմուծման ընթացակարգերի պարզեցում.

4) գերակա ճյուղերում վարկերի մատչելիության եւ հասանելիության ապահովում, վարկային տեղեկատվության կենտրոնացում.

5) իրավաբանական անձանց սնանկացման եւ լուծարման ժամկետների կրճատում.

6) ներդրումային եւ վենչուրային հիմնադրաժների ստեղծում.

7) արդյունաբերական գոտիների ստեղծման ընթացակարգերի ներդրում.

8) ֆինանսական օժանդակության ապահովում.

9) վարկային երաշխիքների տրամադրում.

10) կադրերի վերապատրաստման ծրագրերի համաֆինանսավորում.

11) միջազգայնորեն ճանաչված որակի կառավարման համակարգերի ներդրման բնագավառում ֆինանսական եւ տեխնիկական աջակցության ցուցաբերում.

12) հետազոտությունների եւ մշակութային իրականացման խթանում.

13) արտաքին ներդրումների ներգրավում.

14) մարզերի մասնագիտացման եւ ներհանրապետական կոոպերացիաների խթանում.

15) արտաքին շուկաների մատչելիության ապահովում.

16) նորամուծությունների համակողմանի խթանում, տեխնոլոգիաների եւ գիտելիքի փոխանցմանը աջակցում, գիտություն-արտադրություն կապի ամրապնդում՝ կրճատելով գիտական մտքի արտադրության մեջ տեղայնացումից մինչեւ արտադրանքի փորձանմուշի ստեղծման ժամկետը:

Հոդված 5. Արդյունաբերության զարգացման պետական քաղաքականության մշակումը

1. Արդյունաբերության զարգացման պետական միասնական քաղաքականության մշակումն ապահովում է լիազոր մարմինը՝ ռազմավարությունների, հայեցակարգերի, նպատակային ծրագրերի եւ այլ ծրագրային փաստաթղթերի նախագծերի մշակման միջոցով, որոնք հաստատում է Հայաստանի Հանրապետության կառավարությունը:

Հոդված 6. Արդյունաբերության զարգացման պետական քաղաքականության իրականացումը

1. Արդյունաբերության զարգացման պետական քաղաքականությունը մշակում է իրականացնում է Հայաստանի Հանրապետության կառավարությունը պետական եւ տարածքային կառավարման մարմինների միջոցով՝ օրենքով սահմանված կարգով:

2. Արդյունաբերության զարգացման պետական քաղաքականության իրականացման բնագավառում Հայաստանի Հանրապետության կառավարության լիազորություններն են՝

1) արդյունաբերական արտադրության եւ արդյունաբերության զարգացման բնագավառներում Հայաստանի Հանրապետության ներքին քաղաքականության մշակումը եւ իրականացումը.

2) լիազոր մարմնի նպատակների, խնդիրների եւ գործառույթների սահմանումը.

3) պետական եւ տարածքային կառավարման մարմինների, հասարակական կազմակերպությունների ներգրավմամբ խորհրդատվական մարմինների ձեւավորումը.

4) տեղեկատվության հավաքման, վերլուծության, կանխատեսումների իրականացումը.

5) արդյունաբերության ոլորտում ձեռնարկատիրական գործունեության խթանման, սուբսիդավորման, ապահովագրության, կոոպերացման, արդյունաբերության առանձին ենթաճյուղերի զարգացմանն ուղղված նպատակային ծրագրերի իրականացման ապահովումը.

6) օրենքով սահմանված այլ լիազորություններ:

Հոդված 7. Արդյունաբերության զարգացման պետական քաղաքականության սկզբունքները

1. Արդյունաբերության զարգացման պետական քաղաքականության սկզբունքներն են՝

1) պետական աջակցության հասցեականությունը եւ հասանելիությունը.

2) արդյունաբերական քաղաքականության մասին տեղեկատվության մատչելիությունը.

3) արդյունաբերության կայուն զարգացումը եւ արդյունաբերական քաղաքականության միջոցառումների իրականացման հաջորդականությունը.

4) երկարաժամկետ նպատակների ձեւավորումը եւ դրանց իրականացման հետեւողականությունը:

Հոդված 8. Արդյունաբերության զարգացման պետական քաղաքականության խնդիրները

1. Արդյունաբերության զարգացման պետական քաղաքականության խնդիրներն են՝

1) համագործակցել մասնավոր հատվածի հետ ոլորտային զարգացման ռազմավարությունների մշակման եւ իրականացման նպատակով.

2) նպաստել արտահանման ներուժ ունեցող ընկերությունների գործունեության արդյունավետության բարձրացմանը.

3) աջակցել տարածքային կլաստերների, տեխնոպարկերի, արդյունաբերական գոտիների ձեւավորմանը.

4) աջակցել նորամուծական գործունեությանը.

5) զարգացնել գործարարներին աջակցող կառույցների կարողությունները.

6) զարգացնել արդյունաբերության ենթակառուցվածքները:

Հոդված 9. Արդյունաբերական կազմակերպությունների կողմից տեղեկատվության տրամադրումը

1. Լիազոր մարմինը ԱՔ ոլորտում կարող է վարել վարչական ռեգիստր: ԱՔ օբյեկտները լիազոր մարմնին տրամադրում են գործունեության վերաբերյալ տեղեկատվություն՝ Հայաստանի Հանրապետության օրենսդրությամբ սահմանված կարգով եւ ձեւաչափով:

Հոդված 10. Արդյունաբերական քաղաքականության իրականացման հարցերով տարածքային կառավարման մարմինների լիազորությունները

1. Արդյունաբերական քաղաքականության իրականացման հարցերով տարածքային կառավարման մարմինների լիազորություններն են՝

1) արդյունաբերության զարգացման ոլորտում պետական քաղաքականության ներդրումը, տեղայնացումն ու իրականացումը համապատասխան վարչական տարածքում.

2) մարզերում արդյունաբերության զարգացման կանխատեսումների իրականացումը.

3) արդյունաբերության զարգացման տարածքային ծրագրերի մշակումը եւ ներկայացումը Հայաստանի Հանրապետության կառավարությանը.

4) արդյունաբերական քաղաքականության օբյեկտների շահերը ներկայացնող եւ համապատասխան վարչական տարածքում գործունեություն իրականացնող պետական ոչ առևտրային կազմակերպությունների ու դրանց ենթակառուցվածքների հետ համագործակցությունը.

5) արդյունաբերական քաղաքականության օբյեկտների միջեւ միջմարզային համագործակցության աջակցությունը.

6) արդյունաբերության զարգացման հարցերով միջազգային կազմակերպությունների ու վարչատարածքային կառույցների հետ համագործակցությունը:

Հոդված 11. Արդյունաբերության զարգացման ոլորտում պետական եւ տարածքային կառավարման մարմինների փոխգործունեությունը

1. Արդյունաբերության զարգացման ոլորտում Հայաստանի Հանրապետության կառավարությունն իր լիազորությունների շրջանակում համակարգում է տարածքային կառավարման մարմինների գործունեությունը, արդյունաբերական քաղաքականության օբյեկտների զարգացմանն ուղղված պետական, տարածքային ծրագրերով իրականացվող միջոցառումները:

ԳԼՈՒԽ 2

ԱՐԴՅՈՒՆԱԲԵՐՈՒԹՅԱՆ ԶԱՐԳԱՑՄԱՆ ՊԵՏԱԿԱՆ ԵՎ ՏԱՐԱԾՔԱՅԻՆ ԾՐԱԳՐԵՐԸ

Հոդված 12. Արդյունաբերության զարգացման պետական ծրագրի նկարագիրը

1. Արդյունաբերության զարգացման պետական ծրագիրը (այսուհետ՝ պետական ծրագիր) փաստաթուղթ է, որը սահմանում է արդյունաբերության զարգացման հիմնական ուղղությունները եւ մեխանիզմները յուրաքանչյուր հինգ օրացուցային տարիների համար:

2. Պետական ծրագրի նախագիծը կազմելու աշխատանքներին մասնակցում են արդյունաբերության ոլորտին առնչվող գործառույթներ ունեցող պետական եւ տարածքային կառավարման մարմինները:

Հոդված 13. Պետական ծրագրի հաստատումը

1. Պետական ծրագիրը հաստատում է Հայաստանի Հանրապետության կառավարությունը ոչ ուշ, քան պետական ծրագրի իրականացմանը նախորդող տարվա նոյեմբերի 15-ը՝ հինգ տարի ժամկետով:

2. Հայաստանի Հանրապետության կառավարությունը սահմանում է արդյունաբերական քաղաքականության իրականացման կարգը, որով ամրագրվում են նաեւ Հայաստանի Հանրապետության պետական բյուջեից արդյունաբերական քաղաքականության իրականացմանն ուղղված ֆինանսական միջոցների հատկացման ամենամյա չափերը:

3. Պետական ծրագիրը հաստատում է Հայաստանի Հանրապետության կառավարությունը՝ լիազոր մարմնի ներկայացմամբ:

Հոդված 14. Պետական ծրագրի իրականացումը

1. Պետական ծրագիրն իրականացնում են լիազոր մարմինը, տարածքային կառավարման մարմինները՝ իրենց լիազորությունների շրջանակներում:

Հոդված 15. Արդյունաբերության զարգացման տարածքային ծրագրի նկարագիրը